

## Zaboravljeno razočarenje

Jasna je bila elegantna dama, zgodna i lijepo obučena.

Čim je ušla u moj biro osjetila sam koliko je pozitivna. Bila je vesela (što me je pomalo iznenadilo) jer su obično osobe koje prvi kod mene dođu tužne i razočarane, poneko sa »tužnim osmjehom« a najviše sa lako prepoznatljivom nevjericom.

Mislila sam da je Jasna došla iz radoznalosti, da vidi kako se to može predvidjeti budućnost...

Poslije kratkog razgovora, uzela sam karte i kao obično pitala, dali je nešto posebno interesuje.

Rekla je da je sve interesuje a posebno ljubav.

Kad sam otvorila karte, vidjela sam da je ova osoba sama sebi jedan dobar »provodnik«. Sve što je muči ona preokrene u pozitivno, a ta pozitivnost posljedica je njenog raspoloženja i ponašanja.

Vidjela sam da je tih dana doživjela velike šokove koji još uvijek traju i koji će portajati. Dvoje djece je sa njom. Živi odvojeno od muža, a na pomolu je novi početak vezan za novu ljubav.

Iz karti se dalo još naslutiti: Materijalna situacija veoma loša, finansijska prevara, familijarna situacija nesređena, pored njenog muža druga žena..

Jasna onako vesela i puna viceva na sopstveni račun, počela je svoju životnu priču.

### UTJEHA U POSLU

Ja i Enes smo se uzeli iz ljubavi, mislim da je takva ljubav zaista rijetka. Prava i čista, obostrana, barem mi se tako činilo.

Rodila sam dvije curice blizanke, koje su uljepšale naš brak i uvećale našu sreću.

Znate počinje trka za zaradom, za sticanjem neke sigurnosti, ali i u tome smo se lijepo i zajednički slagali i oboje ravnopravno učestvovali i zajednički doprinosili.

Nikada se nismo odvojili više od jedan dan.

Moja majka koja već dugo živi u Njemačkoj, pozvala nas je da dođemo svi kod nje, da se sklonimo od rata i granata. Enes se u početku protivio, nije htio o tome da razgovara.

Rekao je da ne želi ostaviti stare roditelje i stan.

Nakon dugih »pregovora«, dogovorili smo se da ja idem sa djecom, a on da ostane sa svojim roditeljima.

Tako se i desilo.

Moji dani, meseci i godine bez njega, sporo su prolazili. Našla sam utjehu u poslu, posvetila se djeci. Normalna stvar sa Enesom sam telefonski kontaktirala.

Dvije godine nakon našeg rastanka, rekao mi je:

- »Ženo puštaj korjenje tu gdje si, a ja ću gledati da dođem tamo da živimo, jer ovdje u Bosni nema života za nas u budućnosti«.

Novca mu nikada nije bilo dovoljno, uvijek je tražio i ja sam slala i slala sve što sam zarađivala.

Kada sam 1998 godine htjela da dođem u Bosnu da ga vidim, i da posjetim naše prijatelje, on mi je rekao da je bolje da ne dolazim i da se on sprema nama doći. Navodno: ako ja tamo odem, mogu se samo razočarati?!

Tako je bilo, a 1999. godine ponovila se ista priča. A ja sam mu vjerovala jer sam ga voljela.

Potom sam u gradu gdje sam živjela, slučajno srela jednu prijateljicu sa kojom sam radila u jednoj firmi u Sarajevu. Bio je to dirljiv susret, dugo smo pričale o našoj djeci, o izbjeglištvu i svim mukama koje smo proživjeli. U razgovoru Lara mi je rekla da je bila u Bosni, takođe i da je vidjela i moga muža i ne pitajući me dali smo nas dvoje zajedno reče:

- «Žena koju je oženio uopšte nije njegov par»...

Mislim da sam u tom momentu usred dana, vidjela hiljade zvijezda jasno ispred sebe..

Tada je Lara vidjela da nešto ne štima. Brzo je dodala:

- »Kako? Enes mi je rekao da si ga ti ostavila i pobjegla u Njemačku sa djecom. On mi je rekao da ste se vi rastali. Izvini Jasna, nisam te htjela povrijediti».

Nakon mjesec dana pakleno košmarnog stanja, odlučila sam da otputujem u Sarajevo i da se sama uvjerim u pravu istinu.

Kada sam došla nenajavljeno u svoj stan, vrata mi je otvorila žena sa bebom u naručju.

Pitala sam je gdje je Enes i ko je ona. Rekla je da je Enes na poslu, a ona je njegova žena...

Gospođo Džemila čula sam za vas, pa me nešto povuklo da dodem do vas da mi pogledate.

Ja znam da život ide dalje, bol je u meni velika, ali sada mi je puno lakše što sam ovo sve vama ispričala, jednostavno imala sam potrebu da vam otvorim dušu.

Pogledala sam u njen karte i rekla sam joj da će joj njezin optimizam pomoći da sve brzo preboli, da će je njen muž opet moliti da žive zajedno, nudit će joj nove početke.

Ali ona će povući liniju, a već se ta linija primjećuje u sadašnjosti.

U kartama sam joj vidjela da će upoznati muškarca udovca (kojeg će zavoljeti i udati se za njega, a on će njenu djecu prihvatiti kao otac, ali i njegova djeca takođe. Ona će opet biti sretna.

Rekla sam Jasni da joj u ovoj godini stoji veći materijalni dobitak, kojim će otvoriti radnju. Taj dobitak može biti kao nasljedstvo, dobitak na lotu ili veći novčani poklon.

Njena djeca su veoma pametna i u budućnosti će veoma napredovati.

Nakon nekoliko mjeseci Jasna je ponovo došla.

Rekla je da se skoro sve što sam joj rekla ostvarilo!!

- «Muž me je molio da se pomirimo, i da opet živimo zajedno.. Upoznala sam muškarca koji mi je ponudio brak, lijepo nam je, vole ga i moja djeca.

Dobitak za koji ste rekli da ću dobiti, dobila sam, samo što nije to bilo loto, ni nasljedstvo. Zna gospođo Džemila, ja sam u Njemačkoj imala puno prijatelja. Radila sam kod njih, čistila njihove stanove i čuvala sam njihovu djecu. Kada sam im rekla da se spremam vratiti u moju zemlju, oni su mi obezbjedili prevoz svih mojih stvari. Među svojim prijateljima su skupili novac da mogu živjeti neko vrijeme, dok ne nađem posao. Puno su me iznenadili i pomogli, a i moja mama mi je takođe finansijski pomogla.

Ovdje ću otvoriti neku radnju, a moji prijatelji iz Njemačke su obećali da će mi opremiti radnju svime što je potrebno od namještaja.

Gospođo Džemila, ja sam zaista sretna i došla sam sa vama podijeliti svoju radost, kao što sam nekada tugu sa vama djelila.